

[Augsburg], 22. Februar 1558

An Johannes Oporinus

UB Basel, Fr. Gr. I 11, fol. 217r.

Steinmann Nr. 709.

Lit.: Husner S. 153.

S. P. D. Misi tibi nuper castigationes in Isocratem meas, easque vt ad calcem adderes orau. Petij item, vt eorum quae Neander et Cluserus in Isocratem meditati sunt, chartas excusas mitteres. An mea acceperis scire cupio, et quid de ijs egeris: Illa vt primo quoque tempore mittas oro. Nondum planè abieci omnem spem Bibliothecae tuae emendae, si nondum distracta est. puto Bibliothecam Augustanam intra trimestre exaedificatum iri. Quo facto, si voles, tuam causam agam, vti decet. Xyandro propter inopinatum tabellarium scribere non licet, sed ei dicas velim, me literas illius D. Huld[richo] Fuggero legendas exhibuisse, nec responsi quicquam accepisse adhuc. Videri mihi, vt ipse Dionis exemplum mediocriter compactum, ad eum mittat, cum literis, quibus et gratum animum testetur, et operam suam, si velit, polliceatur, et subsidium modeste petat. De schola Augustana sic habeat, nihil in ea esse quod ita me delectet, vt non abesse cupiam, praeter stipendum, quod vt magni faciam, paupertas facit meorum potius quam mea, alioqui et ipso carere mallem et mihi et Musis canere aut potius tacere. De Zonara, de Demosthene et Aeschine, quid animi habeas, scire mea permultum interest, ne oleum et opera in emendando mihi et annotando pereat. Vale cum tuis, quib[us] P[lurimam] S[alutem] opto, et D. Carino in primis. Raptim. In ipsa Bachanalium insania. 1558.

Hiero[nymus] Wolfius
Tuus.